

重修高淳縣志

已部

卷十七

卷十八

鄉宦

忠臣

孝子

文學

義烈

義夫

高淳縣志卷十七

鄉宦 人物二

宋劉應炎字景暉安撫使綰之後登咸淳間進士初任臺諫以不附賈似道上書忤旨謫景陵縣尹乃賦悲笑二歌歸隱焉

劉愈字初心茅城人咸淳甲戌進士忤丞相陳宜中授宜倫令未竟其用士論惜之

王景雲字仲慶幼穎異學問閎博咸淳間以薦辟授清流簿嘗與弟景華捐貲恤貧乏建怡怡亭式好至老不異居及卒副使劉應昂爲撰墓誌銘

元劉應昂字景文宋安撫使綰五世孫念世受宋恩隱居不仕至元戊子御史程文海學士盧勢按江南訪求人才薦宋舊臣遺士謝枋得等三十人應昂名與焉昂堅辭不許授國子祭酒歷

高淳縣志

卷十七

列傳 鄉宦

一

大司馬年八十一卒諡文襄孫梓字彥敬登泰定張益榜進士官至廉訪使

王均容字受甫少有遠志至元戊子同劉應昂膺薦辟授江陰令縣故有火化及溺女俗嚴禁之擢戶部郎出知廬州約已裕下革弊惠民以疾歸廬其居曰三湖居士

劉鎬字所照愈之子登延祐乙卯張起巖榜官御史有直聲與呂思誠不合投劾去

明夏璿字玉成洪武朝以經明行修被薦授嘉興府知府廉以律已寬以馭民致仕歸囊橐蕭然

嚴恪字叔敬號慎齋祖如桓自中山徙唐昌里元季楊廉夫掌教東湖書院恪從之遊和廉夫白燕詩有穿簾羽拂銀釵落入幕尾分玉剪長之句楊大器之明祖定鼎金陵恪上書陳利病忤

旨發遣滇南建文四年用司馬齊泰薦特召還除給事中不拜
時相奏恪非科道才改國子助教永樂元年三月丁艱諭祭葬
賜金二鎰戊子起舊職轉廣業堂助教辛卯兼左右春坊校書
尋遷左春坊司直時年七十餘乞致仕許之加祭酒贈朝請大
夫子遜任後軍都督府經歷

許英字士華永樂戊戌進士任莆田知縣調侯官邑有僧寺匿婦
女密室中至殺其夫者英多率幹役托齋僧至寺集眾僧扃齋
房中搜所匿婦女悉還其家遂積薪寺門併僧焚之政聲噪一
時擢陝西道御史父昭贈如其官

夏輯字良成宏治乙酉以鄉薦授沙縣令性剛直忤逆閹劉瑾被
黜瑾敗起補瑞安調曲江後以疾歸輯有孝行母歿廬墓三年
張坤字希載明經有至行不近聲色諸生時洪都劉某來邑中困

高淳縣志

卷十七

列傳 鄉宦

二

甚濟之金正德間謁選得開州同知會中貴擅權凌辱屬邑坤
上書解印綬冢宰異之選部郎遣人物色之力勸之官選部郎
卽前受金劉也坤固辭則爲請改授台州府同知賜林下一人
四字歸坤旣家居優游田里歲歉設糜出粟食餓者閭黨稱之
夏華字士英以詩膺成化十三年貢授真定訓導遷故城教諭性
沉篤有操守常資寒士膏火以勵人才

署知縣事廉明慈惠百姓有愷悌作人之頌

張傑字世興性狷介重然諾嘉靖元年歲薦授汝藩審理以嚴見
憚遇人急傾囊不吝居任十年卒貧不能殮士論美之

柳江字朝宗由歲貢授滿城令艱歸復補石城調甯津所至有惠
政在甯津時嘗平反馬省冤獄全活其一家省德之以數百金
爲壽不納繪像祀焉後家居清約如寒素人問曰作令三邑田
不滿百何也江曰多田多人多人多費不如少也時奉爲格言

張蘊字一貞性穎敏日記數千言髻鬣能文嘉靖己酉庚戌聯捷授南京戶部主事稱廉能由本部郎出守懷慶均科額辨冤抑鋤強梗政聲大噪擢山西副使備兵雁門時俺酋外躡邊事孔亟蘊至繕修城隍寨保簡核軍實經畫中機宜俺不敢牧馬城下忽一日興去志遂自投劾歸歸後謝塵鞅訓飭子姓終其身族無訟者

周慎字尚禮十歲能文爲諸生食餼父卿好施予每有予慎輒舉所入奉之卽家貧不惜也後貢入雍放館歸有京兆公餽三十金會歲歉見道旁暴骸卽捐座之比抵家僅餘數金聞鄰人將鬻妻復傾囊與之謁選授蘄水令釐弊直枉清操日厲將入計筭無餘貲士庶醵金爲贖慎一切謝遣至濟甯晨起整襟端坐而逝蘄民立祠祀之

高淳縣志

卷十七

列傳 鄉宦

三

張應亮字汝龍性果敢有爲領嘉靖己酉鄉薦初授餘杭令鋤強剔蠹大著丰采制府才之授以偏師禦倭殲寇於閩之甯香捷聞賜白金文綺改治慶元內陞貴州道御史抵中貴於法聲震臺中出爲四川僉事左遷鄱陽令晉嘉定知府平蠻敘功再賜金綺後以却蜀藩征採焚其豆米舊案芟錦枝樹拂當道歸應亮歷官最久事肅廟穆廟神廟三朝家居議濬天生橋河改折漕糧年八十三卒

韓孜字勉之家貧嗜學嘉靖壬子舉於鄉教諭德平解俸貲課士遷國子助教鄖陽同知鄖守朱某卒虧帑五十兩孜代補隱其事歷任九年清操不易擢南戶部員外刑部郎中會星變柄事者庇私人以孜代左遷不赴歸卒之日家無餘金

夏甯素敦倫砥行誼以貢授邵武訓導時邵武廣學宮有富室以

地故賂甯求免峻拒之遷餘干教諭力行教化士多向方年百歲卒於家

陳九思字福之慷慨不競榮利涪邑官田糧重轉鬻無受者輒詭作民田立券書田去糧存逋積流離嘉靖戊戌九思當歲薦建言不避豪右巡撫歐陽移檄勘丈均虛米困遂甦初令新鄉改靈川至皆有惠政比拂袖歸悉以產讓伯季親知多沐其惠者邢繼本字惟立未冠爲諸生父通判世榮先爲司隸繼本隨任入國學研心文史登順天辛酉鄉薦授衛輝府推官府獄繫盜趙會等七人多姦吏所羅織繼本鏡其情惟會當罪餘皆得免死一少男子姦獄不決閱爰書歎曰十歲女是與戲耳眞耶獄遂雪又有七歲女殺於路無由則焚香籲天夜乃夢絳衣人授姓書寤曰其趙姓乎迹捕之得趙世強果供服衛人神之嘗署汲

高淳縣志

卷十七

列傳 鄉宦

四

輝二邑篆旱蝗民菜色因出家舶米設糜食之民賴全活後擢知府事旬餘以疾卒於官囊無一錢

韓邦憲字子成叔陽子少以奇童稱年十二趙學使鏗奇其文補弟子員十八領嘉靖戊午鄉薦明年成進士授屯田主事佐理大工絕中貴侵冒及管永陵有功晉虞衡員外郎忽一日念父心動告歸父適卒祖母母相繼卒居三喪致哀盡禮時邑侯鄧開丈量邦憲預區畫遂成良法邑官田礲瘠糧重累民邦憲以已戶民田均其糧例行豪右不能違又邑自築東壩沒田若干頃而賦役外復加里甲物料虛懸米八千石邦憲倡減稅議牒兩臺題請永除米八百六十石由是應天尹改里甲入均費八縣德之服闋補刑部遷衢州甫至問民疾苦首揭明大義勤職守實節省復成法議賦役講實政廣儲蓄修武備八條旣卽見

諸行事如祀先賢節孝優禮高隱稽孔氏廟田捐俸養士定賦役之書革織造之姦還寄運之艘增防鑿之兵加開化鹽引皆如其言邦憲爲政大約以教化風俗人才爲先所規畫至今爲衢永利未幾疾作值大旱猶強起書檄發粟賑濟及卒語不及私當道稱其賢邦憲天資英異日覽書至寸許終身不忘作詩文未嘗屬草於典章制度尤精核著有高瀆事宜議四則及衢州諸集卒年三十五位不盡才人共惜之祀衢州名宦郡民復採銅鑄像立常懷祠四時致祭

陳九成字惟和少苦志讀書以歲薦授淄川丞不樂親吏事日與文士譚經藝及暮投劾歸曰名利非吾志與其孤身千里孰若聚首一家比歸室同懸罄敝衣粗食宴如也邑令訪之鑿坏避去年八十四卒無子

高淳縣志

卷十七

列傳 鄉宦

五

陳九儀字惟慎少有名庠序性孝友學使者屢嘉其德行以歲薦授永春令克著循卓擢紹興府通判永民爲立碑及作甘棠亭記以志思居紹興二載政譽益起兩臺交章薦之乃固請老旣歸杜門掃迹建怡亭與兄九成爲白首懽年七十卒

張應圖號鍾河萬曆改元以歲貢任政和令和無城數罹倭患應圖下車首請建城後倭至民得無虞秩滿擢知睢州革陋規八百餘金吏胥不敢私應圖素有至性事繼母以孝聞好施予喜講學歸自睢州年踰七十猶娓娓與後輩討論不休咸稱鍾河先生云

孫夢龍隆慶恩拔貢生萬曆朝授興甯令以才幹調繁大甯擢廣西府通判所至多善政後卒於官

孫思孝字奉先孝友慈惠嘗赴臺試聞母病馳歸又父病疽呻吟

輒流涕按摩凡九閱月衣帶未嘗解及居喪持齋三年萬曆八年歲歉盜掠其家贓據可按孝曰此輩迫饑寒耳竟置不問後以歲薦除合州同知革額外科米均運餉夫役出株連重辟五人會小疾力請告歸閉關養晦不入城市所著有長嘯齋稿旅中草宦遊草

張應望字汝尚別號凝益其七世祖爲宋殿中侍御史宗道應望少讀書卽有鋤強扶弱之志萬曆辛卯領鄉薦明年成進士授烏程令時范司成應期僕橫一邑萬民含怒應望至捕渠惡實於法范懼奏聞投繯死妻吳氏伏闕誣訟緹騎逮望下詔獄舉國驚嘆後從末減論戍久之言官復爲伸救極訟其冤迺詔放歸田應望旣歸閉戶著書以得行其志爲樂事具在史官比之強項令云懷宗朝有詔起用而應望卒乃追贈尙寶少卿

高淳縣志

卷十七

列傳 鄉宦

六

魏成忠字蓋卿登萬曆戊戌進士授餘干令發吏奸實於法士紳移徭差於小民撫按右士紳忠力爭乃定政聲大起辛丑入覲調繁鄞縣立徵輸法歲八限令半銖以上得自輸自是官無逋賦訟者寢息修東西兩鄉諸碑鄞之地利盡出秩滿擢兵部武庫晉職方員外治左牌事凡京師內外巡緝與提督表裏任之部署諸隘巷間輪番宿直具有條法嘗設樅金警聲達旦入計公車無以盜告者及晉車駕先置簿各隘口川流稽察勿使冒濫取驗法甚良至浙東募義兵不私羨餉尋擢廣東瓊州道清覈戎伍儲需充積有妖人金陽子託不婚辟穀惑人交通黎峒起事有日矣忠遣壯士偕一僧誘縛之海外以安陞山西按察使因被誣降歸時閹禍方熾忠遂絕意仕進非公不請謁家居甘淡薄嘗自織蘆號蘆隱先生卒年八十一

黃秉石字復子別號耿山始生時父可文夢飛五色石至因以秉石名秉石無書不讀以經濟國事自任萬厯間選博士入成均秉石應詔待公車尋謁選授順德司李多活枉獄陞嚴州丞攝守暨建德縣篆上下積弊一一剔清奉檄募兵勇不避險丁母艱歸服闋補南雄貳守未幾遷福藩長史入講幄王嘉異之生平遊宦厯厯行李惟書爲累自解組歸日讀書習村莊一時名士如董其昌孔貞運張壽朋輩俱與之遊其風流照耀至今猶豔慕云卒後贈詹事府少詹蔭一子入監官司理時父獲誥贈如其官所著有書奕筆隨偶得紺珠尚存餘撰述甚富惜散佚無收拾者

邢振羽字翔之小試輒冠軍隨登鄉薦五上公車不第授海陽令陽例耗重振羽盡爲革除擢知華州渭南令墨索諸生富者賄

高淳縣志

卷十七

列傳 鄉宦

七

弗得睨盜牽之兩院屬覆讞得情釋去吏謂出富者涉嫌曰吾豈避嫌殺人牘上竟允擢戶部員外掌錢局守益固少司農鄭三俊疏轉郎中政聲丕著署部堂陳於庭復薦其清簡精勤當破格優敘而振羽則假歸省親假滿出守邵武罷杉關稅紓商困後以艱歸哀毀盡禮廬於墓及服闋當起依父母邱墓不肯離乃結菴於側以老年五十有七臨終鸞產分昆弟親戚凡數百金懷宗朝以部覆起用無及矣今從祀忠孝祠

張司重字恂吾萬厯丁酉鄉舉授奉新令奉新故號難治令每以催科獲譴人危之司重曰天下無不治之縣不化之民吾姑往試焉至則與里甲約無鞭笞無重耗速辦汝獎民悅負稅咸輸又邑健訟有以盜牛誣趙某者重覆訊得情邑人以爲神擢延平府丞尋攝將樂篆一以奉新之法行之民欣戴如奉新旋自

喜曰三仕民懷讀書力也可歸矣遂乞骸骨

陳萬善字可一號備我領萬厯丁酉鄉薦登庚戌進士授金華令首謁廟見學宮圯傾捐俸修整併置田於學以歲入爲土膏火邑多灘江田民苦賠稅爲請於上明核開墾陞科抵補節省道府支應費填完前令虧空金七百餘任滿將入覲囊無餘積時吏進庫羨餘金六百却不許乙卯計最轉庫部郎涇故無會館萬善居京師爲置館俾鄉人至如歸尋奉命督造戰具省試工匠諸璫不敢耗蠹物料值京師戒嚴朝議大臣元勳守禁門而本兵率屬萬善當東直門靖共如職己未南司缺階資無先萬善者會文選司謝陞以授私人萬善於是假差南歸癸亥朝廷以駕部郎召是時逆璫熾公卿皆出其門萬善曰不附逆璫不能安身附逆璫且不能安子孫遂不應學使者與直指又交章

高淳縣志

卷十七

列傳 鄉宦

八

薦其清德重望宜表正中朝萬善卒辭不起居家不接見達官惟以成就後學爲念日逍遙東渭園著理學禪說諸書行世又作聖宗直指藏於家無病而終祀婺州名宦

吳學夔字章甫號和區母李氏生夔六歲卒繼邵氏夔事之以孝稱十五遊庠十九食餼爲人端重謹厚及臨文踔厲風發無能先者以恩選入北闈崇正初赴選尙書周嘉其文第一授漢中府推官掌茶馬部舊例羨餘歲萬金夔曰國家何等時官猶私此悉舉助邊嘗杖斃奸充茶商一人弊端遂絕尋以執法忤當事改鎮遠司理鎮城曾陷於苗號難守夔至出奇謀城獲全又署黎平府丈出隱匿田四千餘畝民憚服事聞遷遼州守以勞勩得疾卒於官

諸應龍字景雲少有文名年十六籍於校試輒高等萬厯丁巳里

選爲上杭訓導擢衡州教諭所至以能養士邀學使者嘉獎士人頌之後歸讀書不倦以壽終

陳調鼎字汝玉號鉉五宜春令九齡之孫也性慧好讀書弱冠食餼不妄交間出人罕識面者萬厯戊午登賢書天啟壬戌成進士授戶部主政初差大通橋餉司再差薊州糧儲剔弊釐奸蠹胥膽裂在薊三年常俸之外羨餘盡以充軍餉及賑民饑寒時閩魏方橫熾士夫爭趨走門下調鼎獨耿介不肯移及閩敗奉命抄沒其黨崔呈秀會呈秀有妾父王某與調鼎同年譜聞命下囑庇其女鼎念朝野憤崔魏切齒不肯徇私廢公不允且鞭之遂構禍戊辰出爲金衢兵道抵家見虛糧累涸民捐貲佐費控兩憲疏請永折事幾成而王某禍機發被逮卒於燕京

韓一光字季孚登劉若宰榜進士初授行人奉詔冊封萬安王故

高淳縣志

卷十七

列傳 鄉宦

九

事封王行人卽以沿途交際禮爲橐裝一光概不受癸酉考選河南道御史聲震京師以特疏劾魏黨御書其名於屏大圈者三乙亥代巡四川學士文震孟贈以詩有曾飛白簡豺狼窟不負清時獬豸冠及威望應知有一韓之句都人傳誦到任禁餽獻革冗役官屬貪穢一清有邛州一案株連諸生數十人勘鞫悉保全之後以盜案執法忤座主姜某暗揭外轉浙僉丁丑陞參議己卯陞山東副使尋告歸舊時涇民苦自解糧一光旣歸出揭言官徵官解民困永甦又涇自築東壩沒田十萬餘民苦賠虛米議請改折會大司農黨郎中劉戶科宋皆一光友各致書陳利病因獲永折鼎革後一光猶在隱居二十餘年壽七十六終

邢仕際號警我斷事贈奉直大夫繼康子也好學博通書史以上

舍應詔授西殿中書轉大理寺寺副再遷至戶部員外郎豫章
饑賈勅往賑之捐家貲巨萬以助事聞俞旨嘉獎仕際歷官三
十餘年特恩加四品服俸受誥命三生平慷慨砥行建家廟修
世譜興文社立義倉代輸國課建置公館鄉人頌其事年八十
有四卒

胡有英字穎生清苦力學天啟改元以貢入北雍登崇正癸酉順
天鄉試丁丑授潮州平遠令平遠地陬多阻民每嘯聚爲奸號
難理英曰龔少卿遄往北海虞升卿遠赴朝歌大要有安定解
散之道事豈擇而後任哉比至任察疾苦禁奸暴扶良善民棄
兵弩而樂田畝稻皆兩稔翕然稱治先是崇正八年賊踞城下
越二期英至以方畧殲渠魁賊解去又粵有鐵鑪五其鑛在平
遠往來採取常不下二三千人五方錯雜尤易生奸慝英曰有

高淳縣志

卷十七

列傳 鄉宦

十

備無虞吾其嚴爲備於是境內訖安堵三年大著循卓聲調舞
陽令時中川殘破來官者率視爲傳舍英沿鄉招撫遺黎設兵
繕城措糧充餉士民得以休息上憲嘉其績具疏議遷汝南道
英見時事不可遂乞歸英居家孝友仲兄蚤世撫其孤如己子
韓憲副一光高其行誼延於家

葛奇祚字子長號正生登崇正己卯順天鄉試庚辰會魁以召對
稱旨授兵部武選司主事歷員外郎尋陞四川兵巡道時流寇
猖獗犯境奇祚督兵戰却之擒斬其渠魁羅坤全蜀獲安然竟
以勞成疾卒於官奇祚恨時事艱危羣寇未殄屬纊猶力書守
禦數事上之藩邸重慶紳士爲具請崇祀名宦時督學王芝瑞
批有慷慨誓師高懸赤幟馳驅先士直薄紅巾傾臣子之微忠
示父老之大義等語近秀水朱太史彝尊日下舊聞內一條稱

奇祚廷對剴切後能不負其言云邑人以其與御史徐一范疏請改折虛糧建有坊

李昌裘字治公少聰慧好學年十三入庠食餼戊午禮經決科已入穀以表語一字涉嫌遂置副榜崇正己卯由歲貢授崇明訓導崇明地居海中多不軌昌裘嘗趨府遇寇顧三麻窘之昌裘呼曰我一青氈汝輩何慕寇驚謂李師尊何敢犯叩首謝昌裘因善諭之曰亟歸正作良民吾當保汝無過於是羣寇相繼就撫事聞學按兩臺交薦之驟陞武緣令時闖賊橫昌裘不樂仕道過家慕河上溪干煙霞笑傲辭不赴家居授徒賦詩著有遠菴草性悅篇行於世

魏翰先字賓起博雅多能父庭訓之日課文七藝未未申卽就尤善書法崇正間以歲貢授雲南武定幕雖在公不廢詩書後陞高淳縣志

馬龍州同知值鼎革不赴翰先居家孝友待親屬子姪有惠以家禮範宗人其於書法諸家悉備於鍾王顏柳尤人格在武定嘗抄史記及漢書全本邢孟貞爲作手抄漢書歌亦能詩顧書法最善遂掩其詩聞垂老猶能於燈下作小楷云

王薇字垣夫警敏博學經史過目成誦凡天文地理陰陽兵法悉精曉稱高才生顧數奇闈試輒報罷旣就武科一試掇元直指奇其才詰之始知爲餽廩中人勸令歸文復獲恩選任河南溫邑令溫大裨薇多方存活墊解銀三千餘金時流寇充斥設策擒斬渠魁王芊平臯諸賊有奇功後以艱歸鼎革後不復仕會辛卯里中水議請改折疏稿俱出其手已竟如請後人刊其書顏曰持籌要畧薇旣家居著述無虛日年百歲手不停披惜少見於世云

國朝葛黃裳字中文號仙湄父鳴都耆儒宿德教授鄉里鄉人尸祝之生黃裳天姿英異弱冠以諸生食餼試輒冠軍其文體古勁操管風馳電掣七藝午刻立就嘗與諸鉅公名士周仲馭沈眉生輩以文行相高順治戊子鄉試闈中已定第一人適主司與房考忤抑置副榜第一尋奉 恩詔由拔貢謁選河南太康令養士恤民簿書之暇引諸生譚經藝一時太康人文甲中州太康故當天下之衝大兵往來軍需浩繁黃裳請於上裁減之又河工供億歲有柳梢車輛之令黃裳爲革浮派嚴胥詐委曲籌畫上不虧額而下不病民在任數年盜賊屏跡賦役均平民扶老攜幼戶口多往時規模一新後竟以勞致疾卒於官康人巷哭野祭爲立碑記其子長祚進士世奇亦登鄉薦

徐一范字吳徵號固城生而秀穎性剛直爲諸生文多奇剏舉明

高淳縣志

卷十七

列傳 鄉宦

十二

萬曆戊午第六人崇正戊辰成進士授中書奉差楚藩珉王嘉其品概特疏薦之賜天街紅藥額考選山西道御史丁內艱起復補河南道差巡按河南一范旣貴念淳自築東壩爲蘇常受水漕糧永經改折後以暫借本色一年遂因循未復特奏請復改折如前大爲桑梓惠又嘗捐貲整理文廟倡建永濟橋修葺保聖寺塔及藏經樓邑東門外南湖水漲舟多患覆溺一范於湖中築激殺水勢卽風急得繫纜落帆舟過皆德之識之曰徐家墩順治初年復官禮部轉大同兵憲以兵譁難作死焉事聞諭葬祭蔭一子其祖父俱以前任封贈云

王上林字聖修號錦巖弱冠補弟子員順治戊子學使者試第一尋准 恩貢 廷試復第一卽授浙江湖州府總巡水利督理糧儲鹺政添設同知旋攝本府暨歸安烏程印務時寇盜充斥

賄賂交通自知府以下官悉以賊罪去上林獨清白無點染莅湖八載身兼四篆盤錯糾紛竭力圖報湖人思其德立祠祀之吳會暉字孟昱讀書能文章辛卯闈中遇同舍生病善視之與商屬文大指竟獲售謁兩主考及本房咸奇其文爲索其牘稿行世任定襄知縣陞鬱林知州所至寬平以盜案註誤歸會暉微時家貧鄉人飲無召會暉者嘆曰崇勢利而羞賤貧人情固宜爾邪及旣貴饋遺滿家長子中涵績學有聲以國子生考授州同康熙辛卯已薦以數滿置焉後居京師著書授經有姻家邀人幕不應會里中以事迎歸久之家落饋遺復不至遂賫志窮老以終

邢振岳字畏之號逸園穎悟能文以選拔授金華令興利除弊率多惠政婺鄰於閩初耿逆未著各弁出貸其地酷權子母積息

高淳縣志

卷十七

列傳 鄉宦

十三

數十萬民鬻子女苦不足償振岳下車籲憲入告逆弁由是懾息棄券而歸窮民出湯火婺額南米三千餘石例解温台甯紹運費數倍解戶往往破產而司胥以轉撥漁利堅不可移振岳委曲申請卽以米給本邑防兵撥解之害始除婺民至今頌之繼補陽曲縣地衝附省獄訟尤繁振岳多所平反有龔勝雲者全家十餘口已定入逆案將就磔振岳訊知其枉力爲昭雪罪得釋貢生戴廷枳馬如龍等百餘人皆士類也因忤鄉貴某被誣以逆叛論振岳不畏強禦苦心讞決沉寃以伸晉中有如神之譽後以邛州守告歸膺鄉飲大賓二十餘次年八十卒

孫謙字文益號簡菴年二十七舉於鄉出新城王阮亭之門任六安州學正教導有方擢知湖廣善化縣事縣自平吳逆經兵燹戶口逃散謙以恩信招集開墾民用安堵修嶽麓書院及城樓

官廨皆不擾民又數理冤獄外艱歸民泣送之沿湘江數十里不絕服闋補貴州永從縣縣有六洞爲生苗語言不通租稅須官親往往必有備苗亦集諸羅漢伺洞口約言合得不合則不得入羅漢者少年也謙獨率數人肩輿以往羅漢輩見大悅乃棄械跪起舁輿入洞則男女悉出羅拜稅無稍後語傳諸洞咸欣悅相迎送旬日而六洞之稅集苗有蕭黃巴扒者例以稅附所屬交官聞謙名願得親稅其地爲榮入金三百謙曰是以三百金開兩苗壘也弗許苗益感每歲元夕率男女鮮衣入官廳吹蘆笙作歌綽錫杖聲錚錚効媚悅旣以卓異行取戶部主事差監鹽倉兩場無私羨時阮亭官尚書語人曰部屬官安靜勤勞如孫戶主者足矣丁內艱起復轉員外郎遷刑部郎中謙宅心平恕曹事經議覆者引例務寬後以輕擬總兵高天培事遂降調而謙亦慨然以老請歸時年七十有三矣又六年乃終父兆元庠生誥封如其官

高淳縣志

卷十七

列傳 鄉宦

十四

陳悅日字昇如號羲馭父溇楨庠生家本饒以好施予中落事詳篤行傳旦性至孝母甘氏早世事父及繼母張色養備至更友愛昆季宗族推重好讀書弱冠卽淹貫經史著有樂在堂詩古文集行於時書法宗文衡山以康熙壬子舉於鄉壬戌成進士授內閣撰文中書兼掌 國史明史二館博通典故 誥勅代言多其屬稿出爲杭州司馬政尚嚴肅聽斷明允豪強斂迹歷攝嘉善海鹽於潛樂清四邑篆一署衢州府事潔已愛民如清查嵌田剔釐漕弊修葺文廟建置津梁惠政皆卓卓可紀壬午分校浙闈所識拔多至顯官有爲監司宰執者孫士然以乾隆戊午舉於鄉

葛長祚字燕翼號蒼岩太康令黃裳子也黃裳以兄至渙乏嗣命長祚後之長祚穎異成童卽工舉子業學爲詩古文詞下筆千言可立就膺康熙丁巳鄉舉乙丑捷南宮授杭之新城令新城地偏土瘠民習頑梗長祚寬猛相濟首葺學宮以爲教化地舊時胥吏作奸往往引豪強行苞苴爲弊計一被餌得舞法莫可誰何又稅糧重火耗民苦輸將又有典質婦女俗長祚一一痛懲革之吏民懾服各知恥自愛又嘗通梁築堰以資灌溉爲民永利時浙撫張公運清器重之癸酉聘分校闈試特命作誓率同考告諸神矢公校閱冬復校武闈俱稱得人後行取額外主事轉戶部主政卒於官長祚少以勤讀得氣疾丁外艱致毀疾發伏枕經年至是又發遂不起

王傑字士先號蓮洲少孤學於大父潛心經史爲文根據理要獨

高淳縣志

卷十七

列傳 鄉宦

十五

抒心得康熙乙丑選入成均丁卯戊辰聯捷文譽震一時授山西汾州府平遙令在途聞平邑久旱憂之默禱於神甫入境甘雨隨車邑人歡呼夾道莅治六載百務修舉興利除弊民懷吏畏丙子鄉試分校得人最盛時邊境噶爾旦跳梁平當孔道傑扈 駕出征凡承辦軍需酌量緩急民無重困以報最行取工部屯田司主事念母張年老乞假歸省尋補禮部祠祭司主事入見擢戶科給事中居諫垣知無不言嘗請增有子言氏卜氏二冉氏顓孫氏諸裔博士糾罷臨清北新兩關監督而杭州四務關歲增稅四萬餘賴以邀蠲又粵東糧道某牟鹺商利大吏狗庇併劾之直聲大著 恩賜優渥充癸未會試同考官殿試收卷官明年晉禮科都給事中又明年兼掌登聞鼓事人人想望其丰采忽以是秋九月卒有易經注解經書文稿行世二子

俱上舍生長炳宏辟授浙江温州府樂清縣知縣以事罷起復補廣東翁源東安定安三縣後知博羅縣次炳毅未仕

王孚字顯若號盥亭作文日能數藝於四書題拈之幾遍尤精易理嘗折衷諸家爲易經文稿梓行世稱善本古文詞尚體要詩興致超逸冢宰商邱宋公撫吳時得所爲新柳詩稱賞之刻吳風集中康熙癸酉闈試已掄元以首墨謄錄生誤一字置諸魁明年南宮報罷夏課猶日七藝癸未成進士內艱服闋授閩之連江令陞辭曰進太平頌 俞旨勉作好官孚旣之官本此指題署柱後訖不負其言連邑文教漸衰孚則出俸錢爲膏火立程限課士士習丕振坐官廳士或從郵筒中投課藝必細爲評閱或勸農巡海點保甲濱海村塾中聞呶唔聲必召與語獎諭之他郡邑聞風至有就正者邑前輩陳季立第著有伏羲圖贊

高淳縣志

卷十七

列傳 鄉宦

十六

毛詩古音考等書羽翼經學孚特請祀鄉賢嘗勸民墾荒坂成田若干頃仿社倉法爲儲蓄凡兩遇旱禱雨輒應人人喜謂眞一路福星云又邑有大當名色凡令新任及里長上役應費俱派各圖又逐月邑署諸浮費悉派累里圖孚嚴禁之諸項悉取給橐中連多盜有薛彥文聚衆五縣寨孚點兵壯堵截要路獲其黨縱作嚮道遂得巢穴共獲黨三十餘人處分令誘從自首免陳漢達者人誣以藏僞劄孚會營將勘鞫得實卽爲請釋又嘗質成甯德縣民黃佛任林伯招百餘年不結案數言而兩造服刑輕於他時而犯法者寡福州守楊君行縣問囚數對以一人守爲改容稱異臺灣告警附近如古田德化等乘機竊發連獨賴孚以安有 旨令文職驗武營兵械孚行之大得將士心又繕修城寨哨船防汛及江南橋皆爲國爲民實政嘗攝篆福

清羅源數月政成且代兩前任認填虧空兩處民泣留不可則或設祿位祀於朱子祠或樹去思碑比於棠蔭莅連九年計捐俸竭盡無餘訖以虧空滯陞轉未幾卒卒之日制府以下俱爲文設奠或哭以詩連人爲立石紀功德肖像祀之詳載名宦子元士字麒書郡庠生博學工詩兼多著述并善書法

孔毓儀字端蒙號北園榜名幼儀受知學使者頗遲然童子時揣摩闡墨已入彀故一籍於校隨獲鄉薦是科爲康熙己卯癸未成進士授中書舍人知直隸豐潤縣豐潤巖邑郵傳旁午皇華如織儲侍供頓日無甯晷毓儀捐俸貲應徭役厨傳費毫不派及里民邑舊苦養馬詳請豁除左輔官民賴以俱便丁內艱歸服闋補四川溫江縣改山西交城縣值大旱道殣相望捐俸給棺木邑有積穀萬石太原守行牌撥賑鄰縣不應盡發散給本

高淳縣志

卷十七

列傳 鄉宦

十七

邑又清編審積弊依丁隨糧行例秉公酌審貧苦免累又捐俸開龍門渠引汾河水以灌民田士民歡騰製袍傘奉長生祿位以志不忘署文水縣凡數月澤周四境又奉賑平遙介休兩縣饑查核不遺人人頌德調潞安府潞城縣軍需浩繁不科派民間一文後致仕歸年七十六卒毓儀爲治剔奸釐弊於胥吏尤嚴在交城嘗除一積蠹號老虎者抵於法人服其明斷及遇民則務寬簡尤愛養士子時集生童講肄遇苦寒給以膏火故到處士林向風癸卯丙午兩分校闈試俱稱得人其於親族尤加篤祿入計足自給餘悉分散父綿山贈文林郎儀同年友方苞贊之曰質厚義行比鄉鬱於躬留者長爲表爲繩子孫其繼承劉朝講字右平號丹湖康熙丙戌進士任湖廣孝感令孝感稱繁劇復多豪紳賦役舊設有儒宦戶苦累貧民朝講至力請革其

弊諸縉紳初不悅後更相慕服焉先是民有納妾外舍者已生有子女一日以嫡妻嫁女始一歸行慶禮妻權然具飲食禮妾妾飲食畢卽稱腹痛竟以死妾弟訴於官已誣服矣朝講覆按疑之謂姻戚滿堂何所施其毒且不究毒所從來何以稱信案細訪知妾原有心痛痼疾至是發更劇遂不可救耳獄乃平反又嘗以邑城惡議修築議者請支官帑當費數千金官吏皆得染指或又請派民錢朝講親巡城估算得數百金可辦卽捐俸爲之事竣而 國不費民不擾劇盜劉四聚徒數十鳴鏑殺人俗號響馬賊大爲數郡行旅害乃設法捕治之境內外胥安其在官潔已愛民善政多類是制府張連登計吏署簿曰廉靜惠民遂書額贈之行以卓異薦遽嬰病卒卒之日囊無餘貲

張必新字命之號銘齋康熙丙子舉人丙戌進士知陝西西安府

高淳縣志

卷十七

列傳 鄉宦

十八

渭南縣事到任數月卽詳請修建巒宮捐俸八十金爲邑人倡舊渭南錢糧耗甚重必新至每兩爲減耗一錢人人頌德號曰張佛爺至釀金建祠肖像設祿位祀之陝西學使者王雲錦贈以扁額曰聲燭冰天一日奉 旨令肅州口外屯田買戶捐種毫不派及民間制府特疏請加三級五十六年大兵過縣必新自辦糧料民得不擾後丁內艱邑士民連僉叩上憲保留制府藩司已准會題必新毅然力辭揮淚諭士民士民相對泣下知不可復留則相與製袍傘贈行焚香攀轅執壺漿送數十里始返必新家故貧然好義康熙四十七年本邑大澇倡義捐穀五十石盡心督賑活餓者中丞于公聞之嘉歎以指囷洽比旌其廬

蔣允旦字清伯少讀書敬亭山世父爾星宦粵往省隨貫永安籍

爲諸生逾年選入雍授博白教諭縣故邊隅遭兵燹旦至興學課士文教爲之一新縣有邪教曰肉齋每朔望及子午卯酉期男女夜聚曉散巫覡紛若旦嚴禁絕之他如清學田佃丁累捐俸置義社資貧土膏火纂邑乘修祠祀建學署悉有成勞陞桂林教授卒

劉貺慶字寅伯少穎異讀書數行俱下弱冠食餼以歲薦授臨淮訓導臨困水患學且就圯貺慶力請於令李惟一捐俸修葺之攝教諭兩載以興起斯文爲己任朔望集諸生課於署丹黃甲乙講畫諄諄逾年赴試學使者優等至倍於往時文風翕然一變嘗分俸資貧土膏火勉使自愛母荒學墮操後訖成知名士及告歸送者數十里爲立石志思焉

孔毓綬字泗儒以明經 恩薦授宿松教諭循循善誘潔已先士

高淳縣志

卷十七

列傳 鄉宦

十九

知安慶府趙錫禮加敬之尋以老告歸士民祖道數十里觀者以爲榮毓綬居鄉公恕邑有公事不惜捐貲任勞及歸自宿松足跡不人城市年八十二卒

孫敬銘字魯臣英姿卓犖少有文名爲諸生時便留心經濟領乾隆壬午鄉薦沈尚書德潛器之以才幹調署永順軍民府改授湖南酃縣令燭僞察奸案無滯牘治煩理劇邑有循聲後淡於仕進乞終養歸父士達太學生 誥贈如其官

陳秉惠號彝亭博通經史尤邃於易性慷慨家貧且好施予嘗以修金濟戚友嘉慶甲子以明經舉於鄉考授覺羅官學教習所識多知名士農部戴均元尤器重之歷任浙江義烏樂清縣爲民興利除弊裁冗役絕苞苴振興文教卒於官輿櫬回里囊橐空空墓虎墩山

陳淇號畸園自幼敏而好學十二歲應童子試與兩老者同交卷
學憲有二老不如一幼之譽旋登乾隆甲寅賢書戊辰大挑一
等分發山西歷署嵐縣夏縣五臺甯鄉浮山崞縣陽城長子縣
事俱有政聲補授潞城第三載晉撫福綿密保考語循良敦謹
眾語交符奉 硃批候朕簡用是年兼署壺關又三載引疾不
准晉撫盧坤批本部院下車伊始卽聞該令操行廉介懋著循
聲方深嘉獎遽聞引疾去一良吏殊爲可惜仰卽趕緊醫治務
冀速痊以惠民生本部院實有厚望焉潞在 本朝並未發科
淇力興文教改造學宮嗣後科甲絡繹不絕有人詞垣者公議
稟請人祀名宦事垂成以費絀中止調鳳臺之次年潞人追思
恩德邑紳耆不遠三百里公送甘棠遺愛匾額到鳳一時傳爲
佳話旋解甘餉差竣旋省積勞成疾終晉省公館官年六十四

高淳縣志

卷十七

列傳 鄉宦

二十

淇黎明卽起三更就寢時常查夜公事必自裁決不假他人詞
訟隨到隨審隨結每下鄉看驗常騎馬帶乾糧從者多至七八
人事畢片刻不留恐從人索取民間物也自奉最儉常謂儉者
廉之本故令晉也合省仰其清操孤身遠宦十九年始迎着進
署團聚十閱月而卒喪旋之日士民餞送不絕於路有號泣追
隨數十里屢辭不去者生平著述兵燹散失僅遺有鏡漪軒詩
草長沙許心源爲之序

陶汝霖號商巖生有至性十一歲失恃事父先意承志有泣杖風
登咸豐癸丑進士以知縣分發山西歷任蒲縣甯鄉榮河徐溝
岳陽安邑縣事到處剔弊懲奸育人才課農桑奉公潔已恩法
並行任甯鄉時中丞下札抽墾粟稅霖念民貧不堪盈取且言
非國家正供後必改除力請免之書三上觸怒當道旋撤任後

嬰粟花地稅奉 旨禁革當事者始服其先見十年捻逆窺晉
奉委辦潞城防堵潞境多山週二百餘里霖親歷各鄉推誠勸
諭相度形勢有最要之河峪口宜駐重兵而山高水竭舊有一
井枯百餘年矣霖具牒禱之次日泉出民踴躍歡呼防守益固
屹然爲東南保障更條上團練十六事上台嘉其簡當飭各屬
遵行焉旋署滎河適勝帥獲罪其麾下宋景詩統兵來劫滎之
白馬渡風鶴訛傳皆云景詩已叛霖嚴城守單騎見之諭以大
義曉以禍福詩爲屈服而去出晉境數日而叛於山東調任安
邑前令積案幾百千餘兩月內全爲清結時稱霹靂手捐廉興
條山書院增膏火每月課文親自裁削殷殷解講無倦色歷充
戊午甲子庚午三科同考官得人尤盛十一年兼護解州時夏
縣民因糧聚眾萬餘人鹽道升委霖審辦夏民間之咸日陶公

高淳縣志

卷十七

列傳 鄉宦

二十一

來吾屬生矣留二日訊明了結夏民復業如故竟以積勞成疾
卒於官享年六十五歲著有惜陰齋文集行世 以上舊志

劉芬字蘭階祖繼良父勳以孝義世其家僑寓如皋西來鎮事實
詳好義類芬幼而聰穎好學能文有幹濟才舉同治癸酉萃科
承祖父之志淡於名利孳孳行善主持上海仁濟善堂局務歷
辦燕趙豫贛江皖齊晉等省義賑並經辦紅十字會遠赴關外
救活多人光緒間本邑頻年水災芬籌募巨貲回鄉振濟以地
万有溺女風俗創設保嬰局局費支絀屢募外款接濟重築固
城之德城圩以爲持久計有功桑梓不小並推廣設嬰局於句
溧兩邑耆年時曾赴東洋游歷著有日本游歷日記並紅十字
會摘存各一冊以積勞保知縣升用直隸州知府用加鹽運使
銜補直隸廣昌縣調署新樂縣在任僅三月案無留牘判決如

神新民頗感戴之丁艱回籍適值國變遂絕意仕進晚年得胃疾猶力疾辦江北宿州等處災振生平善無不爲屢瀕危險益自奮勵卒以獲濟若有默相之者辦義振逾三十年不絲毫染指歿之日室如懸罄年四十始連舉四子義方之教一如其祖父之遺焉

黃如棟字文園邑附生肄業府中學堂留學日本五年宣統三年考取商科舉人以七品小京官改安徽知縣仍留本省試用民國元年任江浦縣知事到任後前清秕政盡行剔除刑事無不當機立剖浦地南面濱江屢遭水患向例災多捏報官吏因緣爲利民間反致向隅棟親赴履勘實惠遂以及民翌年夏省城二次革命浦口新開市場火車直達民夷雜處土匪乘機作亂審檢兩廳畏事潛逃棟力爲維持夜不就枕者逾月市面以安以事忤上臺致仕歸在任一載有餘除俸給外絲毫不取旋里之日兩袖清風以積勞成疾卒年僅三十有四人咸惜之

例捐

附

明孫思述字繼明號龍橋由南國子監授山西巖峙縣丞不數月有循吏聲署縣事廉明慈惠巖人有父母之稱

邢祖尹字任祚號起莘崇正元年任福建邵武府照磨署光澤縣事多惠政按院張三謨獎語云掌捕野無吠犬署符民沐清波李超字君聘生平儻有大志饒幹署崇正間任雲南臨川縣尉以勞勩升嵩明州知州勤政愛民勸農課桑黔國公沐天波旌以額曰民歌孔邇雲南巡按旌以額曰賢勞膺獎

清劉閔儒字碩修順治朝入貲貢成均任蒲圻縣丞克著政聲陞遂安知縣閔儒性簡夷不事苛細坐官廳或脫靴置案下搔癢

指甲垢常滿退或跣足履地遇僚屬如家人視民如予民亦視之如慈父母焉家本饒在官悉出已財佐費比歸民扶老攜幼執壺漿送行道爲之塞迨行已遠民則皆泣閔儒亦泣觀者胥太息謂真古所稱挽之不來云後設祠朔望致奠

甘趾字二振歷任雲南布政司經歷攝麗江府事陞浙江都司叅軍克已愛民悉稱厥職卒於官部給勘合送櫬歸鄉

夏朝玉字仕如少讀書具大志以進取未遂由掾曹授浙江鹽大使赴任數月舉從前積弊一一釐剔商民大服解職歸里栽花種竹與故人兄弟飲酒相樂有柴桑栗里之風

李蕃字敬齋少有幹濟才任清江縣知縣代理臨江府事操守清潔一切餽遺屏不受上憲推重之一時言清官者以蕃爲最吏部尚書史貽直贈以額曰政治風清二子長果霖候選主簿次

高淳縣志

卷十七

列傳 鄉宦

二十二

果霞附貢

吳銓字碩圃幼攻經史長習吏治爲人足智多能由附貢援例選授安徽阜陽縣縣丞護理阜陽縣事三月因久任其地悉其利弊力爲興除洽於輿情爲之歌功頌德加捐兵馬司指揮復捐知縣分發直隸委署沙河縣有善政臨行邑人懸甘棠垂愛匾額於公堂後任阜陽縣辛勤過度雖嚴寒酷暑尤必親自巡防因得病歿於直隸省會病前畫小照佈獨釣寒江雪之景吳錫麒爲之題跋其兄鍾布政使理問銜主持家政素多善舉

武功

附

明宋瑛字添材西甯侯晟第六子也襲父爵永樂元年尙咸甯公主授駙馬都尉賜溧水仙圩田三千畝褒累葉功瑛命次子指揮同知偉孫諮留仙圩就產家焉

楊聖譽幼智慧年七歲涉獵羣書過目輒能成誦喜爲詩氣逼老杜從草廬吳文正公講學吳公稱爲一代文豪乃數奇不第朝廷募士遂集鄉俊應召奉命鎮守建康謀畧宏遠賢勞卓著後守安南有長鎗大劍無強敵緩帶輕裘有武功之句見者歎爲有羊叔子風度

清諸秉鉞字彪嘉父葛任四川洪雅縣事鉞其次子也身長六尺虬髯燕頤智勇過人康熙甲寅平三藩趙公良棟典大軍秉鉞投帳下趙故與葛善奇秉鉞才令爲前部摧寇有功擢黃巖游擊鉞以身率士時勤訓練又復挾纊投膠饜餒軍心有古名將風晉甯波中營副總丁亥 駕南巡召各營四品以上較射鉞挽四石弓多命中復晉粵東總兵拜 命之官卒於途

孫如雲字錦堂同治二年八月投效鼎字營帶隊隨勦力戰及攻

高淳縣志

卷十七

列傳 鄉宦

二十四

湖州賊堅壁不戰雲獨率眾登陴被匪火鎗穿傷脉門猶復爭先奮力大隊齊到城遂克復蒙李爵相保奏賞帶花翎加副將銜後以中原奠定奏留兩江督標儘先補用參將惜未補缺而

卒 以上舊志

魏家訓字餘賢以武童投効淮軍勦辦捻匪出力保用把總藍翎同治十三年蕩平陝甘回匪拔補千總留直堵築黃河等處險要工段調山海關建築砲壘隨同出口勦辦熱河教匪歷保至游擊花翎補潮陽營三道梁汎千總管帶古北練軍步隊右營加副將銜隨調援朝鮮接仗右腿受傷賞給直勇巴圖魯勇號護理古北練軍武毅等營事務因傷病舉發回籍調治家訓精力强健忠勇奮發每戰輒當前陣所至卓著戰功傷痊後年逾六旬猶復據鞍顧盼赴京思再効用卒於京邸

論曰書有之爲上爲德爲下爲民而孟子云有官守言責夫一日
立朝四方想望其丰采進爲名臣退而稱鄉大夫鄉先生於不
替非其貴之謂也故能經緯文武勳業光天壤或建議陳書炳
若丹青豈亦曰當時則榮沒則已耶今部署至邑之縉紳家取
其政事文章關國家故者都爲一集題曰鄉宦使徒知侈門閥
者審重輕焉

